

時局聯中外。星軺萬里旋。觀光認郟子。泛斗晤張騫。旌映扶桑日。

鞭揮塞柳烟。還朝述風土。重鎮記溫泉。

誰道蓬瀛遠。崑崙匹馬過。葡萄新釀熟。楊柳別情多。贈策期觀海。

論交恰止戈。寄言伊相國。景慕有湯和。

再贈

壯志凌霄筆有鋒。虬髯風度恨遲逢。諸邦遊歷無停轍。獨立天山第一峯。

筆底傾談訂別期。地球風景任君知。崑崙此去應登頂。遙瞰俄疆憶戰時。

南州少佐方家教正。阿克蘇道潘震

有客扶桑來。丰采何超逸。相逢非偶然。天涯聚一室。環顧五大洲。

英才不世出。名相仰伊藤。高風許與匹。學劍敵萬人。曾作中軍帥。

武事尚其餘。如椽誇健筆。壯哉萬里遊。驂騑馳遠駟。長風宗慤乘。

險馭王尊叱。一肩行李輕。山川歸著述。奚囊壓錦鞍。珠璣盡噴溢。

酌酒為君歡。談笑數促膝。惆悵賦驪歌。邊聲動鬢策。

海內齊聞伊相名。緣慳恨未結三生。今朝幸遇東瀛士。心比葵花向日傾。